## الديوان السادس

# صقور وفراشات مائمة

بقلم

عبد المنعم أحمد بدر



### بطاقة فهرسة

حقوق الطبع محفوظة

#### مكتبة جزيرة الورد

اسم الكتاب: صقور وفراشات هائمة

المسولف: عبد المنعم بدر

رقم الايداع ١٠١٧/١٠٨٤٠

الترقيم الدولي / ٨-٩٦-٥٦٥٦-٩٩٧

الطبعة الأولى ٢٠١٧



# الاهداء



إلى القارئ العزيز، وخاصة ذلك القارئ «المجهول» النادر الوجود، الذى يبحث دوماً عن الإصدارات الجديدة، ليشبع رغبة لاتفتر لقراءة كل جديد.

أقدم له ديواني السادس، سجلت به خواطرى المتباينة، المتعددة الموضوعات بالعامية المصرية في معظمها، والقليل منها بالفصحي.

وأرجو من القارئ العزيز ألا يضيق بتعدد الموضوعات بكتاب واحد. فعندما نفقد «رفاهية الوقت» أفراداً ودولاً – ونصبح في سباق مع الزمن، فتتعدد الأولويات ولا نجد ما يمكن تأجيله إلى الغد!!

كذا ستجد قارئى العزيز فيما كتبت تعبيراً عن بعض الواقع الذى نحياه بهمومه وأماله جنباً إلى جنب مع كلمات مصدرها ذكريات قديمة أو صوراً فرضت نفسها، فلزم إفراغها على الورق قبل ضياعها من الذاكرة، على أمل أن تجد فيما كتبت ما يرضيك وبعض المتعة والفائدة.

#### عبد المنعم أحمد بدر

# مقدمة المؤلف



لعل كل منصف يرى الآن طاقة النور التى بدت واضحة فى نهاية النفق المظلم الذى إحتوانا عقوداً، ويشعر بتجدد الأمل بفكر جديد مخلص يدفع الوطن لأفاق أرحب قد تعود على المواطنين جميعاً بالخير والرفاهية.

وأتسأل؟ هل نسعى جادين للتعاون والتكافل معاً لتتسع دائرة النور وننتقل لعصر جديد؟ أم مازال بيننا كثرة تضيع الوقت والجهد – في البكاء على اللبن المسكوب، والتحسر على ما أصاب الإنسان المصرى من علل وتخلف، دون المشاركة في الدفع للأمام بشكل جماعي في إتجاه التنمية المستدامة – لنلحق بمن سبقونا في إعادة بناء أوطانهم ومواطنيهم بدلاً من الإكتفاء بالجلوس بمقاعد المراقبين والنقاد بصورة ممجوحة، دون بذل الجهد فكرياً وعملياً للإسراع بتحقيق ما يستحقه وطننا الغالي وشعبه العريق من مكانه بين الأمم.

مصرنا تستحق منا الكثير لتستعيد مكانتها بين الأمم كرائدة في صناعة الحضارة الإنسانية، وهذا حق رغم أنف [ مزوروا التاريخ -

الحاقدين والكارهين كالصقور الجارحة بالخارج، المتربصة بالطيور المغردة والضعيفة دون تفرقة بين الرائعة الجمال بألوانها الساحرة، أو تلك الداجنة ثقيلة الحركة، فجميعها في أعينها الحادة فرائس] ، وكذلك ورغم أنف أصحاب الأفكار الشاذة والرجعية أعداء التطور والنجاح بالداخل، الساعين والداعين للفرقة والصراع بين المواطنين بتنمية العصيان والطائفية وزرع أفكاراً رجعية عفى عليها الزمن، فصاروا أداة هدم لأوطانهم سواء كان ذلك لأطماع دنيوية أو جهالة فكرية، وأصبحوا كمخالب لصقور الخارج تستخدمها لصيد الفرائس. وبث الكرايه وطمث الجمال وبدع الخالق في مخلوقاته في السموات والأرض. فلا يرون في الفراشات ألوانها الجميلة- وأنها ناقلة للحَبُّ والحُب بين الأزهار لتتنج الثمار-، فيرونها كمجرد حشرات لا قيمة لها، ولا يتأملون في خلق السموات والأرض وما بها من أيات «فيـذكرون الله قيامـاً وقعـوداً وعلى جنوبهم "بل يحولون العبادة لأشكال صماء خالية من المضمون فيصبح الدين تجارة والدعوة سياسة وأي صورة للجمال ىدعة.

دعوهم في غيّهم وليكن شعارنا لا تراجع ولا تخاذل فطاقة النور واضحة أمام الجميع فالندفع جميعاً للخروج من النفق المظلم، وياليتنا نسترجع الشعار الذي أطلقه «اللواء محمد نجيب» أول رئيس للجمهورية المصرية رحمه الله وهو: [الاتحاد- والنظام- والعمل] فقد مضت عقود وعقود دون الاسطفاف وراء ذلك الشعار، فمازلنا نعيش متناحرين لا متحدين، نمارس الفوضى والعشوائية كأسلوب حياة بدلاً من النظام. أما العمل!! فكل عامل نرى بجواره ثلاثة من المراقبين دون مديد العون. ودون تأديته بالجودة المطلوبة.

وحدوا جهودكم أثابكم الله وأعملوا فإن الله يحب العاملين لإعمار الكون، ويلعن المفسدين في الأرض.

# هُموم بَشَرْ وَأُوْطَان





# أوراق وأوراق

برد الشتا وريح أمشير وورق الشجر طاير وماله عَدْ دَبْلان وصَفَاره بآن عَلخَدُ وجِه المطر جَرفه في قلب الطين ويفْضَل مكانه ولاعمره تاني يطير!! في الأرض يتحول تراب وسماد يجدد حياة الشجر والخضره والمزامير!! وزهور تفوح بالعطر والياسمين وأوراق صيف شتا نِقْطعها بإدينا

في الصبح أو بالمساء يوماتي مانِسينا!!

لجل ما نِحْسبْ أَمتَه نِهاية الشهر مستعجلين يجينا يوم القبض!! ناسين إنها أيام من عمرنا بتطير وبسرعة تجي النهاية ويوم القبض!!

وورق النتيجة وإحنا حنبقي تراب لافرق بين الفقير ولاحامل الألقاب وورق الشجر أفضل كتير منّا أصبح غذاء للشجر وفل و ورد وإحنا طعام حشرات ودود الأرض!!

# شباب ما بعد الثمانين

قَصّاص وكّاتب عَالمي إسمه «أرنِسْت همنجواي» قال الشباب شباب الفكر ويمكن يكون بعد الثمانين وأنا بقول: طُولْ مَافِيْك عَقْل وَرَوْح أوعى تِسْتَسْلِم لِجُروح ولا تُقول دِي مِشْ أَيَامِي وعلّى الصُوتْ مَطْرَح مَاتُرُوح

• • • • •

فكر للايام الجاية

- صقور وفراشات هائمة حتى لو باقيلك يوم دَ الفكرة بتيجى فى ثوانى وفكرة مفيدة طبيعى تدوم

ياما أفكار كانت لأصحابها أطيب ذكرى وأحلى هدية تنفع الأجيال الجاية وللبشرية بحر علوم

نظریات وعلوم لولادنا یبنوا بیها صروح وفنون أوعی تقول دی مش أیامی وابنی وعَمَرْ وارْسِمْ وأكْتُبْ حتی لو باقیلك یوم

وعلّى الصوت مطرح ما تروح

# خير الكلام

#### قالوا:

شِبِعْنَا كلام ومعاهم حق!!
كلام فى الفاضى والمليان
والفاضى أكتر من المليان
والكَلمنْجِي ماعندوش وَقتْ
يعمل حاجّة تفيد غلبان

«خَیرُ الکلام ماقل ودلْ»
 ودی قناعتی بفضل الله
 حتی کلامی من غیر صوت
 علی الورق مکتوب بهدوء

— صقور وفراشات هائمة ولغيرى يمكن مايبان!!

. . . .

أهى فضفضة ما تضرش حد فِكْر عجوز عُمرّه إمتد عاصر فاروق وجمال وسادات ومبارك وثورات شعبيه لنهضة وكرامة إنسان!!! ومُرْسى وأيامه السودة وثورة ثالثة مالها مثيل في التاريخ ماشافها النيل

والحقیقة ضروری تبان وسَجِلْ یا تاریخ ثورة ملایین مالها مثیل علی مر سنین وخَلّوا کلاکم فِ الملیان

# إدنا مين ؟ ؟

همّا وبس المسلمين!! طَبْ وإحنا مين؟؟

لِسه فاكر سن الطفولة سبع سنين - تمن سنين جَنْب أبويا يوماتى أصلّى وقَبل مَاكُل لازم أسمّى وبكلْمة الخمد أحلّى !!

يوم الجمعة بَشْتاق إليه وفي أيد أبويا أروح أصلّي

صقور وفراشات هائمة

وأسمع أذان الجمعة يسرى وأكرر وراة لكن في سِرَى الله أكبر الله أكبر وأشهد بأنه وحده رّبى والمصطفى نبيكه بِقلبى أركع وأسجد زى أبويا وبعد الصلاة أسبح وأدعى يحفظ أبويا ويشفى أمى

.....

وشَهْر الصيام يجى بفرحة وبناتنا بتصلى بطرحة وأنا الصُغَيّر «ماليش صيام» أزعل وجرب وصوم وأتعب وأفطر بتمرة وقوم قوام عشان أصلّى ويّا الكبار

دَ إللي عشته وأنا صغير وكِبرْ معايا ولاتْغَير!!

. . . .

كَملْت دِينى بزوجة طاهرة وكرَمْنى ربى وقدِرْت أزكِى وطفنا ببيته ووقفنا عرفة زرنا نبينا بِبيته وروضته وصلينا بفرحة وخشوع!! وعنينا ملياها الدُموع!!

. . . . .

حَامدين وشاكرين نِعْمته طاليين غفرانه ورحْمته وحمايته لينا بِقدْرته مِن شَرْ أعوان الِوسُواس تاجروا بدينا وخدعوا الناس

#### صقور وفراشات هائمة

لاذمة ولادين ولا إحساس

ورَغْم القتل والتخريب

يقولوا علينا كافرين

والقتلة بس المسلمين!!

نبقى إحنا مين؟؟

نبقى إحنا مين؟؟

. . . . .

# أه يا سوريا

الجرح غائر والله ياسوريا في القلب وكمان إلو جدان لابيهدا ولا يوم بيخف!! ولا قادر في لحظة أنام قولولي أنام إزاى وأنا شايف إللي بيجري لناسنا هناك؟ أطفال ماتت بالألوفات وأمهات شايلين أمواتهُمُ!! الدمعة محبوسة في عنيهم والآه نار مش مسموعة في عز البرد والخيمة مقطوعة

صقور وفراشات هائمة
 ودُول كبيرة ضميرهم مات
 نجحوا يفرقوا بين لخوات
 وصَحُوا الفتنة وكانت نايمة
 وإحنا نيام زى الأموات!!

هما يخططوا وإحنا ننفذ بملشيات قابضين ألوفات وسلاح يوصلهم ببلاش خونه مرتزقة أوباش وتاجروا بدينا وفرقوا بينا وقبضوا تمنّا مِليارات

ويقولوا في مجلس أمن!! وأمم متحدة وحقوق إنسان!! يبيعوا الوهم لشعوب غلبانه

عن حرية وديمقراطية ترُفَع وتنمّى الأوطان والواقع شيئ تاني تمام

· · · ·

الاستعمار له شكل جديد مهما نبني أو نعمر هما يدمروا في الأساسات باللعب في عقول أولادنا ويفرقوا ما بين لِخوات إللي إتبني نهده بإيدينا ونعيش في غربة وشتات وعذاب فوق كل الحسابات!!

# «فریهان مَامَنْش»

جَرّاح إنجليزي أمريكي قديم إخترع جراحه (بالتخريم) تحول مُجرم لشخص مُطِيع وشرس جداً لحَملُ وديع ودَه أسلوبه للتطبيع..!! بجراحه سهله من جنب العين أدواته أزميل وشاكوش يد مربيهم فص بالمخ مريضة يصبح بدون حيلة عايش مَيّت ماله قيمة!! والإعلام ضخّم قيمتة وهو مُدعى جاهل مهووس!!

• • • •

تلاميذه وأحفاده عايشين حافظين لفكره بعهد متين للهيمنة على فِكْر الناس عُلما أطبه سياسين وبالسُلطة ألوف ملايين...

. . . .

والعلم حَوّل الأزميل!! لموجات أثير عبر الأقمار فوقنا وتحتينا شمال ويمين فى بيوتنا وفى غرف النوم ما يصدهم باب ولاجنزير يعدّلوا عادتنا وعقولنا باللى لازمهم من أفكار

صقور وفراشات هائمة
 شعوب ساذجه وغلبانة
 والإحتواء أصبح عادة
 لنهب خَيْرات وتراث
 عُمْرُه قُرُون وِزْيَادَة!!

...

ماهو الوضيع يحقد عَلْنَاس تاريخ حضارتهم كانوا أساس خايف لاترجع حضارتهم و يحكموا عليه بالإفلاس!!

. . . .

عشان كده تلاقية مشغول بزرع أسافين بين لخوات ويمدهم بمال وسلاح يقاتلوا بيه بعضيهم عشان هو يعيش مرتاح!!

وياريت السلاح وحده يكفية أدوات مساعدة كتير جاهزة حبوب هلوسه لغزو عقول تحول الذكى لعبيط مجنون يقتل أخوه وأمه وأبوه شايفهم كَفَرة وملهم دين!!

# مش فاهم

أسئلة محيراني باسمع كلام شايفه عجيب!! هو مين إلى إنتصر؟ وألاّ مين أصبح أسير!! وألاّ مين هو إِلْغَني وليه بيحسد الفقير؟ إلسجان رغم شراسته!! جوة نفْسُه ليه سجين؟ وإلى عايش وسط أهله ليه كمان بينهم غريب!!

وناس بيرضيها القليل

ونقول قسمة ونصيب وناس بتاخذ ولاتديشي إللى عنده ما يكفيش وناس تقول كنبا زمان وناس تقول ضعف إيمان وناس تقولك كله زفت وغيرها يقول كله تمام وكل ماعلومنا تزيد يحوّلوها سلاح مبيد؟ ويقولنا كُلْ السلاح بتنتجه لجل الدفاع وإلى موجود عندنا يكفى لتدمير أرضنا ألف مرة وألف مرة والنهاية أكيد ضياع

# حلم غالک

العدالة حلم غالى بس حلم بعيد بعيد ورُبَمَا يِكُون مُسْتَحِيل!!

• • •

وفى تاريخ البشرية القريب ولا البعيد تلقى ميت ألف دليل من عهد آدم وهابيل لما طِمِعْ فى حق أخوه والغراب دفن أبوه وذكان درس مفيد

إتعلموه كل البشر والحقيقة بتندفن والمعتدى يبات سعيد والحكم تلاقيه حاير رغم إن الحق باين ومهما نقول أو نعيد مش حانشمع شيء مُفيد!! والعدالة الكاملة لسة حلمنا الدائم ...بعيد

29

# بيْعَلِى أَرْضَكُ ؟؟

جه وقاللى بيعلى أرضك وإرتاح يا خويا من همها!! قلت تقصد زرعها؟ قاللى أرضك!! يعنى تقصد نَخْلها؟ يعنى تقصد نَخْلها؟ ولا سَنابِل قمحها؟ قاللى أقصد كُلها... قاللى أقصد كُلها... يعنى طينها ورملها!! يعنى طينها ورملها!!

لو دَه قصدك لِيّه شرط!! لو قدرت تحققه تبقى دفعت مَهْرَها

فرح وقالي قولّي شرطك

. . . .

الحساب بينى وبينك بالْعَدد مِشْ بالمقاس!! عن كل حبّة رمل تعدها من طينها وكمان رملها والسعر أنت تحدده بأى عُملهة تِحبها من غير مُغالطه في الحساب

. . . .

إبدأ وعِد ولما تِخلُص مجموعها لازم تضربه في سنين تاريخها عمرها ودَه شَرطْي وإبقى قابلني لما تِجهز مهرها!!

. . . . .

# رسالة لنونى بيلر

رئيس الوزراء البريطاني الأسبق

دلوقتي بس إفتكرت؟؟ جريمة غزو العراق؟؟ (\*) التاريخ ياما حَيكْشف جرائم حرب وإفتراء المستعمر الشرطبعه ينهب غيره وخيره يلمه مصلحته بس إللي تهمه!! الغزو عادته والغَدْر طبعه الوفَرَقُ تَسُدُا دستور ووضعه يزرع فتن ومؤامرات

(\*) العدوان على العراق ٢٠٠٣.

لا يهمه مين عاش ولا إللي مات

. . . . .

ورغم جرايمه فى كل مكان بيحمى آل حقوق إنسان!! ضميره صِحِى؟ لألأكدّاب!! بالدنيا ما يصْحُوش أموات....!!

# مشاكل مصر الاقنصادية

إسم كتاب نشره أستاذ فى الخمسينات من قرن وفات كانت مشاكلنا فى زمانها أخف كتير من زمن «الشات» مشاكلنا زادت ماتحلتش لا فى حياتة ولاً بعد ما مات!!

كل ماشوف مشاكلنا تزيد أترحم عليه وأقول وأعيد الرحمة ليك ياجمال ياسعيد إنت «وكينز» ورأى سديد

• • • •

ماکنش إشتراکی ولاشیوعی ولا «رأسمالی» بدون توجیه ولا کلاسیکی بدون تطویر کان له قناعة بفکر جدید

...

نظرية فيها أدوات تحليل فين فعرف بيها رايحين على فين عرض وطلب لكن بميزان لاحرية زايدة ولاحتكارات أوسوق مغامرة ومضاربات والدولة دورها مش غايب بخطط مدروسة ود لازم مش عشوائية ومال سايب ومتابعة بِقانون عَادِل حَازِم!!

فی الزمان دَ علوم زادت ونظریات جدیدة سنا سادت

صقور وفراشات هائمة
 وكم إتفاقيات دولية
 وبنك دولى وصندوق نقد
 لحل مشاكل أزليه
 بدل الحروب لقتصادية
 وإلى يخطط يراعى تمام
 نظم وقوانين دولية

...

بلاش فضايح أبو العُريّف والعيش نديه «لخبازه» لو رأى سليم أهلا بيه لو من خبير في مشاكلنا عَالمْ بالجارى حواليه ونفسه نحقق أحلامنا ونشوفها تانى أم الدنيا إحنا معاه وإيدينا في أدية

### أم المشاكل

قالوا مشكلتنا سياسية!!

قلت عادي...

قالوا مشكلتنا إقتصادية!!

قلت طبعاً....

لما سكتوا - قلت أنا

نسيتوا ليه لجتماعية؟؟

أُمْ المَشَاكِل بَقَتْ هِيّه

وأصعب قوى في تعديلها!!

. . . .

تبىي مصانع **تبنى بيوت** 

تبنى قناطر طرق وسدود

صقور وفراشات هائمة بإرادة وإدارة نِصُونَهَا

...

لو نسينا تبنى إلى يصونها وبالأمانه والعلم يديرها نبقى بنينا بدون أساسات وإللى بنيناه نلاقيه ضاع بالعشوائية وسوء الطباع!! إبنى إنسان تبنى أمة والأمة شعب يعنى بشر وهما دول فيها الأساس

# صُوّر بالكلمان

۱ - العمر مش أيام وسنين
 د أصغر من كده بكتير
 خطوة شمال وخطوة يمين
 ونفس شهيق ما بعده زفير

•••

۲ مشیت سنین بطریق سبقنی فیه غیری
 کان نفسی أشق طریق یتبعنی فیه غیری!!
 لکن السنین جریت وغیرها ما یجینی!!
 وما عدش ینفع ندم علی عمری وسنینی

• • • •

صقور وفراشات هائمة
 ٣- مصر أم الدنيا ليه؟؟
 لوّ ماتعرفش دوّر
 في التاريخ تلقى الإجابة
 وفيه تلاقى ألف ليه؟؟

٤ - قطيع خِراف قدامه دليل
 كبش كبير وقرنه طويل
 ماشين وداه بدون تفكير
 ياخذهم مرّات لمرعى وبير
 ويضيعوا معاه ومش راجعين
 وأخر المشوار يروحوا للجزار
 .....

و - بهيم ضَعْفان غَمَّولة عِينيه
 داير في ساقية ويضربوا فيه
 فقد الإحساس والتفكير

لاقادر یهرب ویفك عینیه ولو اشتكى،حیشكى لمین؟

 ٦- مدرّب كِلاب وكلابه كتير وُولف أرمنت ودُبرْمان
 على إيده يتحولوا لِوحوش
 ويغمل بينهم سوبرمان
 ومن غيرهم رعديد وجبان

۷- نفسی أرجع شباب تانی
 والبس البیادة ولكاكی
 أقف د دبان علی حصونك
 أحمی ترابك وحدودك
 والغالی یرخص لصمودك

#### دولة قانون

سمعته قال.... الماحدش في البلد دي بياخد حقه بالقانون!!» راضى حُكمُكم... بقه ده کلام يتقال؟؟ في زمن بتبني فيه دوله قانون نِرسّخ بيه صورة للناس في العقل والطبع والوجدان؟؟ ونبقى حصان مَالَهُش لِجَام!!؟؟ قبل ما تِرَدِدُ كلام سمعته بالعقل يابني إفرزه العقل زينة وميزة الإنسان

ليه تبقى زي البغبغان!! تعاليم دينك ياإبني والدين هو الإسلام دين الفطرة السليمة و أساس لكل قانون على مر الزمان رغم إختلاف اللغات وتباين العادات أصوله واحدة ياإبني للخير وحماية الإنسان يعنى أساس كل القوانين وأصوله شرع بكل الأديان ويعنى إزدراء القوانين كأنه إزدراء للأديان وعدم إحترامنا القوانين ليه نبقى أشبه بالحيوان!!

#### «حكاية القرامطة»

«۲۷۸هـ حتی ۲۲۷۸هـ»

تاريخ الطبرى مليان حكايات عن الخوارج بزمن فات!! يعنى الإرهاب مش مرض جديد د تاريخنا فيه أزمات وعِظات عن أفاقيين جَندوا عصابات بأفكار شاذة ضارة لا تفيد فيرميت (\*) أصبح له أتباع ببراعة وقدرة عَلْ الإقناع

<sup>(\*) (</sup>رجل من خورستان إستوطن الكوفة يظهر الزهد ويعمل بنسيج الحصر من الخوص ونقل المتاع للناس على ظهر ثيران يمتلكها ويكثر الصلاة وإذا قعد بين الناس حَدَّثهم في أمرو دينهم، وأدخل على دين الإسلام ماليس فيه...). من تاريخ الطبرى.

رغم أنه شيّال لِمتاع أتباعه أصبحوا بالميات وشوية شوية بقوا ألوفات «والقرامطة» (\*) بقى ليهم إسم حتى بعد ما «كِرْمت» مات الصلاّ خلوها خمسين فَرضْ الصوم كفاية يومين إتنين والجمعة نصليها يوم لتنين والقِبْلَة ترجع للقدس ولو جُنُبْ بلاش إستحمام كفاية الوضوء تبقى تمام!!؟؟ قطعوا طريق قوافل حُجّاج قتلوا رجالهم ونهبوا متاعهم وباعوا نساءهم للأغوات

<sup>(\*)</sup> اسم الجماعة نسبة لكرمت.

صقور وفراشات هائمة

وبنات لَلمتعة «جهاديات»!!؟؟

والحجر «الأسعد» سرقوة

علشان للحكام يبيعوه

شوهوا دينا بالخرافات

وبِدَع دينا منها براء

ويقولوا: محمد رسول ونبينا

وإحنا بس له أتباع

وغيرنا كفرة والدم مباح

ياما جماعات دخلوا الإسلام

بالاسم بس!! مع نقص إيمان

الإسلام مش إسم وبس

دَ إيمان بالقلب وفعْل الخير

وسلام للكل ليه والغير

••••

# «شیخ مَنْصَرْ»

دَ إسم لكل حرامي كبير والسرقة لها أصول وفنون!! إقرا إللي جيّ تفهم ما أقول

....

فى نَشّال أيده خفيفة ياخد إللى معاك من غير ما تِحسْ وترجع بيتك تعبان هَلْكان وتسأل نفسك – المحفظة فين؟

> أخَصائي تزوير حسابات يمكن يسرق بالألوفات بقيود حسابات وهمية

صقور وفراشات هائمة
 نکشفها بعد هروبه بَرّه
 ویمکن بعد ما یکون مات!!

وفى مسئول ما بيشبعش على على كل إللى معاك وفارض نفسه شريك وياك ونصيبه يوصلة فى الأول حتى لو إنت ما تكسبش حقى مش رشوة أبداً وكلمة شرف مش لعب عيال!!

ولص بيوت اسمه هَجّام يدرس بدقة ظروف المكان ويعرف صَاحُبة وإمتى ينام!! ويخطط لدخوله وخروجه يسرق ما خف وغلى تمنه وزى ما دخل يخرج بِسلام.. ولو صحيت وحسيت بيه سلاحه جاهز وإنت الندمان!!

وأخطر نوع من الحرامية دول وحكامها سارقينها يا ما لِسْتِعْمَار شَغّل حَرامية لِسرقِة أَوْطَان وَنَهِب شُعوبِها!! كانوا زمان يهجموا بجيوش يستولوا على أرض ونّاس يحولهم خدم وعبيد ومقاومة بنبؤت بالإيد ضد سلاح فتاك ومبيد وعلشان ما نقلش راحته يوكل عَنّه حرامية ماهو نهب الغير عنده مزاح

صقور وفراشات هائمة يجند عملا خونه أتباع أرخص كتير من حرب بسلاح تخطيط شياطين وزرع أسافين بين أهل وجيران وخوات يحاربوا بعض وينهد الحيل وتُصْبِح بَلَدْهُم عِرض مُبَاح لاستعمار حِيّله كتير بيغير جِلده زَى التِعْبان والصِراعات تِخْلَق أَوْضاع مَاكنتش أبدًا في الحُسْبَان نَاس تهاجر أُلوفات ألوفَات مِش مُهم كَام مِنهم مَات لكن المُهم بيهَاجروا لِفين؟ جايين لِينا؟ لامِش مَعْقُول!! إقفل حِدودَك يِبْعِدوا عَنَا إِرْهَابِيين – دُوْل جَهَلَة وسُود

«شیخ منصر» جدید بقاله وجود شايل القناع ووشه مكشوف عينه عَل البترول ببجاحة يقول ناخده تعويض عن إللي عملتوه طول عمركوا غاويين صراعات وأوعوا تقولوا دى مؤمرات أو إننا بعنالكُ سلاح!! من كل الدنيا أنتو أشترتوه وتقتلوا بعض وإحنا إللي نحوش ونصرف عليكم ياما فلوس أهو ده صحيح أكبر شيخ منصر وياخوفي منه .. وياما حنشوف..

#### «أذر الكلام»

علشان ما تتعبش وتحتار من إلى جارى حوالينا! إسمع كلامى للأخر منا برضو زِيّك مِحتار وزيك وزيّى كتير حيران

أوعى تصدق لو قالوا ما عدش وجود للإستعمار وكل الدول أصبحوا أحرار أمم مُتحدة وليها قانون ومجلس أمن وفيه عقوبات ومحكمة دولية بإيدها ميزان...

. . . .

وديمقراطية تلزم الكل
وحرية رأى مكفولة
وعُولَمَة شِعارها جَذّاب
وحقوق إنسان محفوظة
بقانون دولى وجمعيات
محلية ودولية كمان!!
وإللى يخالف عليه عقوبات!؟
وفي الواقع تلاقيه كذّاب

لَوْ دَه صحيح نبقى فِي جنة لكن إللى جارى شيئ تانى والكل قلقان مش مرتاح والدم سايل بين الناس

صقور وفراشات هائمة وناس بتاكل بعضييها الجشع أساس بحياتنا وناس بتهرب بعيالها تغرق وبيقولوا قدرها!! وإللى ماتو ميّات ألوفات وغيرهم بيتمنا موتتهم أرحم من وجود في الغربة وحالهم أسوأ مِلْ الأموات

وأنا حزين هرشت فراسى والشعر لبيض له إلهام وسألت نفسى سُؤال مشروع إللى جاريلنا حَصَل صدفة؟؟ واللاّ مخطط وفِعْل شيطان؟؟

• • • •

أكبر شيطان مِحُور للشر صناعة جديدة للإستعمار «وريجيسير» يوزع أدوار على شخوص بعقول غايبة ولصوص خونة وضمير إتباع!!

...

تَعَصُّبْ فِكْرِى وَصِرَاعَ أَدْيَانَ وهو وجماعته بقوا أعوان وملحدين على قلبه عزاز والأعلام ينفخ فى النار تولع حرايق فى كل مكان ....

مَهو لِسْتِعْمَار زَى التِعْبَان لِنموه بيغير جِلْده لجل ما يكبر كمان وكمان

صقور وفراشات هائمة
 وعشان ما يفضل هُوه لِفوق
 وغيره يعيش ضعيف غلبان
 ينهب خيره وعقوله كمان!!

...

لاستعمار غير جلده لكن فكره زى زمان حروبه أسبابها إقتصادية وصراع محافظة عل أسواق بصواريخ وسلاح في كل مكان ويقولوا إنه سلاح للردع!! وصعب يكون سلاح عدوان

ولو إستعمله قائد مجنون؟؟ شايف فيه تدمير للغير...

وناسي إنه تدمير للذات!!

والناس تُباد من كوكبنا وسكنوا بدلنا الحشرات وعشان ما نفضل إحنا ضعاف لازم يكون بينا صراعات «وفرق تسُدُ» في سياسته أساس!! تبقى يسارى وغيرك يميني متطرف وتقدمي أو علماني وديّنا يُدْخُل في السياسات ويقسمونا لطوائف أكثرية وأقليّات

. . . .

إعلام موجّه وفضائيات وسائل تواصل مشبوهه وشبابنا يدخل بمتاهات ويضيع عمره في الخلافات ينسى العلم والإبداع وينشغل بالتفاهات والخلفات!! لستعمار أصله ما يشبعش في المصلحة ما يعرفش أبوه!! وإِللي ينافسة لو حتى أخوه يعطله ويوقف حاله أو يحتويه ويقوله شريك!! والربح تاكله المصاريف!! لو ما طاوعش وأخده شريك يشيّلُه هَمْ مهاجرين من حروب من إخراجه يوصلوا أرضه بملايين وهو يقفل بابه عِليه ويقول دول إرهابيين!! ما هي سياسته لعبته شياطين أشباح خفيه ومش حكومات بيلاعبوا بعض على حِسابنا ويحولونا قطع «شطرنج» يكلونا قطعة ورا قطعة ولا يبقالنا عسكري ولا زعيم!!

...

خلاصة الكلام إلى حقوله نجاتنا عاوزه وقفه بجد ووحده هدف بأروحنا نصونه وعمل لنهضة حقيقية بخطط شاملة وعمليات تنفيذ سريع ونكران ذات وقانوننا يصبح سيف بنار للمفسدين والحرامية..

# حيرة إنسان



#### سن القلم

سن القلم عاندنى!!
ورفض يخُط الخط
فِضِلْت أَلَاطَهَه وأَحَايْلُه
بلط ونام فى الخط
شَخَطْ فيه .. إكتب
وخلّى الكلام واضح
على السطور فاضح
وكفاية تخفى المعانى
بين السطور بالرمز
شبعنا غمز ولمزْ!!

صاب القلم رعشة

صقور وفراشات هائمة وحفر علورق كلمات «عمرى ماكنت جبان»!! حواليك ورق مَليان وياما سهرت ليالي

من قهر للإنسان!!

أكتب عن إللي كان

. . . .

المشكلة مش فى الكتابة المشكلة مين يقرا؟؟ عاوزنى أكتب لمين؟ والكل نسيوا الورق بالنت مشغولين!! ولما نسيوا الكتاب لازم يصيبنى إكتئاب!! وعاند ونام عل الخط

## إغتراب

أنا من ضيع في الأرقام عمره!! رغم عشقى للكلمات والنغمات كراهيه الجمع والآكتناز كالبخلاء!! أبغض «الطرح» خصماً من نصيب الفقراء وأمقت «الضرب» لو أضحى ظُلماً وإفتراء وأعشق «القسمة» – كرما وجوداً وعطاء

کان قدری حفظ الأمانات بغرف صماء (\*)
خرجت منها خاوی الوفاض کیوم دخلت
ودراسات جدوی لمشروعات لتحقیق نماء
ربحت منها تاج العفة حین رحلت

(\*) الغرف الحصينة للبنوك.

#### صقور وفراشات هائمة

الغربة عزلتنى عن صحبة الشعراء وحُرمت جلسات الفكر والعلماء والآن أراجع أيامى – كم سطرت من الأبيات حباً لبلادى وعشقاً أو نقداً أو حتى هجاء؟؟ أسمع إطراء أحبائى لما أنجزت

لو أنى قبل الشيخوخة بدأت

وأراه قليلاً قليلاً....

#### نفسلهٔ فی ایه؟؟

سألت نفسى نِفسك فى ايه؟ جانى الجواب من جُوّايا حامد وشاكر ونِعَمه كتير من غير ما أطلب فضله كبير ناقصنى أيه؟ ناقصنى أيه؟ قلت لنفسى ولاحاجة وأمر طبيعى أبأه سعيد!! وليه السعاده حلم بعيد؟؟

بَصّیت لغیری لقیت الناس بتدور علیها زیّ کَمان؟

صقور وفراشات هائمة

فقیر أو غنی وعیشته فُل ویرجع یقول مالقتهاش ودورت عنها فی کل مکان

. . . .

....فجاة لقيتى عِرفْت السر أصل السعاده محتاجة لناس يتشركوا فيها يا إمّا بلاش والناس بقت كله في حاله وحتى الجيران مانشوفهاش واللى يلاقى نَفْسُه وحيد يلقى السعاده حلم بعيد

#### قالوا فى الأمثال...

إبعد عن الشر وغنيله حكمه قالها أكيد مساكين عاشوا في قهر سنين سنين ظلم ماعرفوا جلنا منين!!

بلطجي وفي إيده سلاح وهمة نهب قوت الفلاح وغزاه فرنجه نهابين وفي خير بلادنا طمعانين

ظلمهم ساد بين الناس

صقور وفراشات هائمة
 وشرهم بقى نابه شديد
 والضعفاء ضايعين فى بلادهم
 ومش عارفين ريحين على فين؟

• • • •

إزاى بتسأل يا إبن النيل والأرض أرضك وإنت أصيل ولك تاريخ فيه ألف دليل على قوتك بأرض النيل رَسَمْ طريقك وبيقويك؟ تهزم الشر بعزم حديد والخير يسود والرزق يزيد والشر بطبيعته رعديد ومهما الحرامي يكون شرير لو إتمسك جبان خنزير مستنى سكينة الجزار وهو يهرب مل لسكاكين

. . . . .

مواجة الشر فرض عليك من غير أغانى أو تماحيك وإحنا إلى قادرين عالتغيير والخير يعم لِيّه وليك

....

#### الحال غير الحال﴿\*)

بعد غيبة رجعت مشتاق للى فات!! أرض الصبا والبراءة والخضّره والأحلام بدعى ربى ألاقى جمالها لسه هناك زي ما كانت جزيرة الورد مش بس كلام

سألت فين الغيطان؟ والخضرة والأزهار؟ أمّلّى عينى بجمالهم، يوخُولى بالأفكار يمكن أكتب قصيدة من قلبى إلمحتار شاوروا وقالوا هناك ومشيت أنا المشوار

• • • • •

<sup>(\*)</sup> جزيرة الورد سابقاً اسم المنصور حالياً

«الكاميرا» كانت في إيدى ...

لكن الخَضَار مَطْفى

ولا لاقى زاوية مناسبة خالية من الجدران!!

حتى الطيور إختفت وهِربْ «أبو قردان»!!

كُتَلُ من طوب أحمر طاغية على الألوان!!

. . . .

أيه دَ إللِّي شفته دَهْ؟

يمكن تكون عمارات؟

لا لا دِ مقابر - للخضرة والإنسان؟

من غير ما أشعر لقيت الكاميرا في جِرابها

مَكْسُورة النفِس «بتقوللّي مش أُدره »!!

ياريت تاخذني معاك لبعيد

بعيد بعيد لمكان

ما يكنش فيه بنيان!!

. . . .

# حيرة إنسان

سألتنى إنت مِين؟ تقصد إسمى؟ ولأوظيفتى؟ ولا نسبى وأبوية منين؟ ومعرفتش أرد وأقولها أيه!!

هو الإسم يهم فى أيه؟ ياما صفات عكس الأسماء!! صادق تلاقية أكبر كدّاب وسعيد راجل حزين موكوس محفوظ دايماً متعوس منحوس!!

. . . . .

يمكن بتسأل عن شغلى؟ ومرتبى أصبح كام؟ لو قلتلها إنى موظف «مستخدم» وليّه رئيس يوم فى طنطا ويوم أسوان ومهما قبضت عايش غلبان!!

• • • • •

مش معقول قصدها عیلتی یاما عَالم خَلّفِ جاهل أو دکتور أبوه غلبان وجنینی إبن حداد ودَ رغم الْعِرق المداد!!

ولو قصدها أصلي ونسبي أنا مصري من عيلة تمام

صقور وفراشات هائمة
 وأكيد أصلى فرعونى
 وجدى طارد الهكسوس
 وبِحُبُه لأرْضُه ونيله مهوس
 أقسم إنه مايلوثه أبداً
 وإنه بروحه وماله يفديه

قلت وهَنْعب نفسى أنا ليه ؟ مش عارف أقولها أيه !! دَ أَنَا مخلوق من مخلوقاته سبحانه سمّاه إنسان وعَلّمه كل الأسماء ميّزَة بالعقل وهداه لطريق الخير أدامه وشيطان الشر وراه ورسالته بالأرض يعمّرْ

ويسبح بإسم الله وعرض عليه أمانة الدنيا وعقله الضعيف صورله يقدر يصونها ويحفظها وقبل الأمانة ياولداه !!

ومن غیر لف أو دوران أنا واحد غالبان من دول حیرته وعذابه من عَقْله ویوم ما حیکعرف هو مین یقول دغری بدون تأخیر

## مسئولية قلب

سَأَلتُه؟؟
أيه إللى تاعبك ياقلبى؟
ردّ وقالىّ:
خايف على بلدى والناس
الشقيان وحتى المرتاح
مِتحرم عليّا النوم
لا يهمنى شكر ولا مال
خايف فى لحظة أبطل دق!!
وأكون سبب فى وقف الحال!!

# القدوة

قبل ما تهندس وتخطط فِكْرَك يِوَصّل مش متلخبط لازم تؤمن باللى تقوله وتكون قدوة للى بيسمع ويِتْبَعَك فِللّى تقوله!!

ترشيد طاقة كلام عاقلين والأعمدة متسابة مضوية عَلْ الأرْصِفَة وِجوّه الدواوين طول نهارنا وشمسنا طالعة

صقور وفراشات هائمة

وقولّلي يا خويا نصدق مين؟؟

. . . . . . .

صاحب دعوة وحامى الدين وشايفنا إحنا ناس كافرين يكدب ويقتل وعيشته حرام من مال سفلة مالهم دين نمشى وراك؟ نبأه مجانين!!

. . . . .

مراقب نظافة مسئول بالحى وزبالة ورا بيته أطنان مزرعة هايلي للدبان ومهما يجازى العمال يأدوا الشغل بجد إزاى؟؟

إتحاد ملاك ولُيه مأمور بيشتكى من فواتير نار كل شهر تزيد وتزيد ولا فكّر مَرّة يجيب سباك وسيفونه بيدفق ليل ونهار!!

## كلهة أحبلة

عَيْزَانِي أَأْوُل إِني بَحِبّك؟؟ الحب مش كلمة وخلاص الحب عهد - عطاء- إخلاص الحب قَدر في علم الغيب من غير كلام بنشعر بيه حبل نور يجمع قلبين رُوح واحدة بس بجسدين وكلمة أحبك تقولها العين أبلغ كتير من أى كلام أو أي شعر يملا دواوين!! يعنى بحبك من غير صوت ودَ بيقولوا عليه - بَحبّك مُوت...

# للفصحي حنين





# سادرة أننع

سِحْرِكْ بَدّل لَدَى الفُصول
بین ذراعیك شموس ونور
بَردُ شِتائى أضحی ربیعاً
وصارت حیاتی تملؤها الزهور
جلید المشاعِر ذاب سَریعاً
وأمْسَی جَداول عِشقِ تفُور!!
لم نلحظ حتی قدوم الربیع
فأیامی بِقربِك ربیع یدوم

ونِسمة صَيف تُداعبِ صَدْرى تَهدَّءُ ناراً بقلبي الملوُل

صقور وفراشات هائمة

ووهج الظهيرة يصير شروقأ

كإطلالة فجر جديد جَسور

. . . . . .

وجاء الخريف ولا تعبأين فرفقة عُمرٍ عَهْد متين ونَزداد شوقاً بفيض الحنين ويكفينا وهجاً مَلْء العقول فَسِحرك بدل لدينا الفصول

إهداء إلى رفيقة دربى ليلك ليلك في عيد ميلادها ٣٠/ ٢٠١٦/١١/ ٢٠١٦ عبد المنعم بدر

### عيناها

عيناها ... فيهما سِحر وشعاع كاللهيب أَرَّرى الأهداب قاتلنى؟ أم اللون الغريب؟ أم ترى النظرات واللمحات والبدع العجيب؟ وضياء الحسن ذو الوجه الحبيب؟ يخطف الأبصار والألباب والقلب الصليد بقدر ما أهواهما بقدر ماأخشى المزيد!!

# الأصل والصورة

فى المرآة أراه أمامى
بصورة كهل معكوسة
النُسرى تبدو كاليمنى
واليمنى ليست مبتورة
لاتقوى أن تحمل فأساً
يكفيها أن ترسم صورة!!
والصورة بالكلمات دواء
قد تُشفى النفس المكسورة!!

يَهِفُو للماضي أيام صباه فلست أنا مَنْ في الصورة

مازلت أنا الطِفّل الحَالم أتأمل البشر والأشَياء وكل جَميل والألوان والنبت الأخضر وبذوره

• • •

ووهج الشمس وأتعجب!! لو تُضبح يَوماً مكسوفة وضياء البذر بصفحة مَاء وأكره مشاهدة خُسُوفَه

. . . .

مازلت أنا ذاك الشارد السابح في بحر النغمات أوراقي تضج بالألوان أحول الطينة والصلصال لأشكال من نبت خيال

صقور وفراشات هائمة
 وأراها أمامي مصفوفة

. . . . .

وأُدَرِب أعداء الفِطرُة كُلْبى وقطتى البيضاء لصداقة من دون عَداء وطعام من ذات وِعاء وسِلم دائم بينهما دوُن عهودٍ مكتوبة!!

أفقت من حلم الصورة ورأيت الواقع طبق الأصل والماضى أبداً ليس يعود لكن الذكرى باقيةً كَرسَم الفِرْعَون – محفورة!!

• • • •

# «حِلْم الصّبا»

رأيتُكِ نجْمة تَعْلُو تُضيء ظَلام أحلامی فَيَبْدُو الحُلم وزْدياً يُفَتِحُ وزْدَ أيامی وأجِد المُستحيل دَنا ويَدنُو نوال أمالی

يأتى الصُبْح يُوقِظنى مِن أوهَام هَذيانى ويَسْأَلنى مَا أَعْدَدت!! لِتَصل لِنجمك العالى؟؟

# الأرجوحة

أرْجُوحَتى مُعْلَقة بَينَ الأرضِ والسماء نُحيوطها كَأَنَّها من مَاءُ مُعَلِّقة بِسحَابة سَوْداء في لَيْلَةٍ ظُلماء لا يُضيؤُهَا إلاّ البّرقَ فَأْراهُ بَشيِر ضِياء وفَجْر نَماء فَتَصْعَد أُرجُوحَتي في السماء

••••

يَغيبُ البّرقَ سَريعاً

وتَعَوُد الظُّلَمْة وتَنْقَطِع خُيوطُ المَاء فَتَهُوَى أُرجُوحَتى أَبْحَثُ عَن خيطٍ أَتَعَلَقْ بِهِ فَلا أَجِدُ غَيْر هَواء وتهوَى أُرجُوحَتى نَحْوَ الأَرْضَ لأَجِدَهَا عَطْشي جَدْبَاء دُونَ نَمَاء كَقَريَةٍ بِدُونِ نِساءُ

# «عِنَابِ الدُّكِماء»

أرهقنى البرد فَدَفِئنِى لَسَعات البرد تؤرّقنى!! فى الماضى لم أطلب هذا فدنوّك كان طبيعياً صيفاً وشتاءً يومياً!!

لا أنكر أبداً تدليلي فحنو ك دوما يُرْضيني ووهن الاجساد لا يمنع تجميع الطاقة لِتحمينا ودف الأجساد يُشعِرنا

أنّا مازلنا كما كنّا روحُ واحدة فى جَسَدين ونعِمة صُحبتنا تُغْنينا أدعو الرحمن أن يحفظها لَنبقى معاطول سنينى!!

# لحظة غروب

واجماً رأتنى في صَمْت مريب فيما تفكر؟؟ سؤال غريب!! أفقت قليلاً من غفوة عقل أراجع فيها حصاد السنين فالعمر طال - رغم الصِعاب ملأتة الشجون وصوت الحنين!!

إلحاح سؤال عن وقت الغروب؟ أيأتي قريباً؟ وأين يكون؟ فليس غروبي كغروب الشموس يأتي مساءً يتبعه شروق

فالنفس إن غربت لا رجوع ليوم الحساب ويوم النشور سبحانه ربى علام الغيوب

#### أنا و البسطاء

قَالُوا كَلِمَاتِك بَسِيطة ... لا تَرقَى لِبِدَع العُظماءُ وإصداراتُ النُّخبة والأُدبَاءُ صدقاً قالوا: أُكُتبُ للعامة والبُسطاءُ فبدونِ فَهُم المَضْمُون كُل المَكْتوب يَصِيرُ هَباءُ وصُعوبةُ فَهْمِهِ، يَجْعَلهُ هُراءُ!! ما الحِكْمة من رمزِ وخَيَال يملأُ أوراقاً لاتُقرأ؟ يراها العامة ألغازا وأَحَاجِي لاتُغْنِي الفُقراءُ؟؟

# منلخِ إليلخِ....

شُعورٌ غَرِيْبٌ لا أَدْرِى لِمَاذَا؟ أُريْدُ الهُروبُ لأَيْنَ وَكَيْفَ!!؟ طَافَ بِعَقْلَى شِرِيْطُ المَوَانِى كَثيرةٌ عديدةٌ كَصَوّرٍ تَدورُ شَرقًا وغرباً كِقدْرٍ يَفُورُ لمْ أَجِدْ المِرْفَأَ فَتَوقَفَ سَعْي فَكَانَ هُرُوبِي مِنكِ إليْكِ!!

## هى والكلمات

أَرْهَقَنِي البَحثُ عَنْ الكلماتِ وسَطَ الأَوْرَاقِ والصفحاتِ فَجَمَالُها لحنٌ مسحور يُوحى بِسَيْلٍ مِنْ أبياتِ

> فَمَاذَا أَقُولُ لِعَيْنِيْهَا ؟ أَو لؤلؤ سِن والبَسَمَاتِ ؟ وسَتَائِر شَعْر عابِثَة حَارت بهواهَا النَّسمَاتِ ؟

> > . . . .

أو قَدْ «نِفْرتَارى» الأمثل

أصبَحَ مِقْيَاساً للمَلكاتِ والأجمل بينَ الحَسْنَاواتِ وأُنوُثَتُها تَفوقُ الحسابات!!

. . . .

سَأَقُولُ سبحانَ الخَلاق فَجمالُ الأنثى مِنَ الآيات يُتممه حُسن الأخلاق فيصيرُ طَيفاً كالنّغَمَات!!

# حوار مع ذان الخمار

رِفْقًا اغْمِضِی عینیكِ كَی اسْتَثْرِد أنفاسی فَبریقُ عَینیك ثاقبُ تَغَلغَل فی حشاه ذاتی وَوَهِنَ القلبی لایقوی صُموداً أو أی إفلاتٍ

ولمحتُ اهداب الجفون سِهاماً في جُعبة الرامي فهاذي رايتي البيضاء ارفعها مستسلما لقضائي

فَلُوْ نَجَوْت بِذَاتی مِن شُعاع عَاتی فَلا نَجاة لِقَلبی مِن سِهَام الرّامِی

. . . .

سَمِعتْ كلامى فدنت بدلال فثار فؤادى مما تَحيك!! قالت كلامك يسبى العذارى وإن كان لى فقل ما تريد رايتك البيضاء ردت إليك وأرْفَعُ خمارى لتقول المزيد فتحت خمارى وحى جديد وغير الكلام – لا لن تزيد...!!

## كنا خسا

لالا-لستِ أنتِ

لو كنت أنتِ ..؟

فَأَيْن سِحر إبتسامه ثَغر؟

وبَسمَةِ عَيْنٍ كَسَهْمِ أَغَرِ؟

بريقٌ خاطفٌ يسبى القلُوب

وصوتٌ حنونٌ كلحنٍ طروب

نَغم مَسْحور لِلروحِ يسْبي!!

. . . . .

مَاذا أصابَك؟

ومِنْ أَيْنَ جِئْتى؟

لمَاذا العبوثَ وحِدةٌ صوتٍ؟

وهَذا الغُرور كأنكِ صِرْتى.. كبيرة قومِك والكُل يجرى رهن الإشارة لَوْ أنتِ شِئْتِى؟ لالا – لالستُ أنتِ!! فعُودى كَمَا كنتِ!! أوْ مِنْ حيثُ جئتِ

# غثاء السيل

يا غُثاء السيل هَلْ حَل زَمانك؟؟ وصدقت نبؤة الأمين في وصفِ شُعوبك؟ غُثاء لا يَمكُث بالأرض لِتَخْضَرُ رِمالُكِ!! كثرة في شتات فَضَاعَتْ قُدراتك فتكأكأت الضياع

تمزق أوصالك!!

وتزرع الفتن

بين عيالك!!

. . . .

الغوث الغوث

يارب الممالك

بِغَيْثٍ جَديد

يمكث في الأرض

فتنبت أجيالا تحمي كتابك

لِرفعة دينك بين الممالك!!


### «مكنبة الاسكندرية»

تاريخ ومكان

همجية جاهلية غزت هذا المكان في زمان الظلام وسطوة الكُهان حَوّلت أَسْفارة الكبرى رماداً ودخان وعَاش الإسم محفوراً على مَرْ الزمان بفيض عُلوم وفنون توارثه الإنسان نُور العلم بدّد الظلام بالأذهان فالعلم يمكث بالأرض فتخضر فنان يَرْفَعُ رَايَاتِهِ فِرْسَانٌ عَلَى مَرّ الزَّمَانِ وهبوا الحياة للإغمار ورفعة الإنسان فأعادوا البناء فزاد الضياء يعم المكان!!

# من أوراقي المبعثرة





#### فرعنة !!

العاقل يقرأ تاريخ بلده يتعلم من أخطاء غيره وإللى يكرر أخطاء ناسه ويفرعن قائد أو حاكم يستاهل إللى حيجراله لو أهمل قلمه أو فاسه!!

## قلب مشحون .. لراجل عجوز

لو بتدور على المفهوم بدون فلسفة أو أى غرور أو كلكعة تقف فى الزور وغموض ورمز مش مهضوم إقرأ كلامى تلاقيه واضح سياسة وحُب وياما هموم!!

راجل عجوز قلبه مشحون بِحبه لِبلده وناسه بجنون نفسه خواطره توصل ليهم ولِوْلَادِه وَأَحْفَادِه بِكِتَاب

أملة يساهم بفكره وعمرة ويزرع خير لكل أحبابه لايهمه شهرة ولا كتر مال ولاعضوية إتحاد كتّاب!!

. . . .

#### یاریٹ !!

بأندم ساعات على إللّى فات رغم إنى !! عارف إنه مات وكلمة ياريت مَاتبنى بيت ورغم ده بقول سَاعات يوميها ليه عَمْلت «كِيت»!! ويارتني زَاد صبرى ياريت

#### طريق الخلاص

المكتوب مكتوب وخلاص عيش أيامك بالإخلاص والواجب أديه بضمير يوم الحساب ما في منه خلاص

> ما عدش وقت للأحزان ولا الجراح باقيلها مكان الدنيا فانية دَ أمر أكيد والعاقل يقضيها في سلام

> > . . . . .

#### قلبح مشاع للناس

قلبی مشاع للناس الحب فیهم أساس وقلوب فیها الرضا وإید نضیفة تنباس ..... د قلبی قلبك زی ماهو قلبی

سبحانه مجمع القلوب

لو کنت من دول یا صاحبی

أدخل ولا تخبط!! وبحبل المحبة خلينا نتشعبط!!

#### عقدة نقص

قالوا في المثل ... عَلْ الأصل دوّر!! خليك معايا ولا تتحير د مثل أكيد على مر سنين في أجناس وشعوب ما تغيّر الأصل الطيب ظاهر واضح في ناس كتيره دايماً حواليك على قد الحال والرزق يا دوب حامدين شاكرين وكمان راضيين وكرامة وعزة نفس ودين ورثينها عن جدود هايليين ودُوَلُ وشعوب والرزق كبير حاقدين حاسدين لازمة ولادين ورغم غناهم والملايين ع الغلابة حاقدين حاسدين!!

#### خسوف ول كسوف!!

إيه إللي جارى للقمر؟ دَه مش خُسوف!! دَ القَمَرْ مَكْسُوف إستخبى ورا السحابه السودة خایف پشوف الظلام إللي معشش في الرؤوس كل ما يحاول ينوّر جَهْلنا يخبي نورة وبدل ما إحنا ننكسف بدلنا هوه مكسوف

صقور وفراشات هائمة

حتى النجوم هاجرت بعيد

شافت سما غير سمانا

ناسها تقدر نغمِته

وتسبحه على قدرته

ما إحنا بطلنا نشوف!!!

....

## الديناصور إنقرض

الديناصور إنقرض وبيض الديناصور موجود! مدفون في أرض الغلابة يفقس غِيلان وديابة تنهش في لحم البشر جوّه وخارج الحدود

#### كركبة فكرية

حابب تعيش وسط الكراكيب!! وتزحم عقلك بكل غريب وبتحافظ على الهلاهيل وفِكْر مُعادى مَاله دَليْل

> بتدافع عن كل قَبِيْح حارم نفسك من كل مَلِيْح تقول عنه بدعة وحرام!! بدعه إزاى؟ وفيها الخير ليك ولأهلك وراحة للغير

> > ....

رافض ليه كل جديد؟ عقلك حابسه بقفص حديد لو رأيك كده إشبع بيه

لو رايك كده إشبع بيه .

وسيب غيرك يبني جديد

.....

خليك في الضلمة وبلاش نور ولا حتى لمبه وفيها الجاز في زمانها كانت أمر جديد وإنت بتكره كل جديد

. . . . . .

خلص عقلك من الكراكيب. وجدد فكرك تعيش سعيد

#### كنٺ حقولها!!

لما فاشل ينسب لِنفسه كل فكر وعمل عظيم ببجاحة يحلف ألف يمين كنت حقولها وهحققها لو كملت أربع سنين!!

هو ناسى شعب مصر بانى حضارة من ألف عصر يقدر يميز بين الشريف إللى إيده وقلبه نضيف وإللى قلبه عل البلد وبين إللى بايعها وقبض!!

## «مِلْکی وأنا در فیه»

الحرية حق ليك وحق ليه!! تحافظ عليها ليا وليك وللجيران واجبة عليك

صوت زلزال صحّانی مِن نومی قمت أجری أشوف فی أیه؟ قالی البواب بسیطة ما تخافشی أستاذ مرسی بیهد جدار ویضم البلکونة لأوضته والأوضه مش سَیْعَالُه شِوَار ما هو عفشه کیر

- صقور وفراشات هائمة - طِلْعْتله وصبحت عليه مبروك يا جارى بتعمل أيه؟؟ رد الصباح ووشه مقلوب إستحملونى كام يوم معلش نظام الشقة ما كانش عاجبنى وهى كده عفشى ما تسعشى ....

غلط وقلته دى تعديلات محتاجة تصاريح وموافقات مِلْ الحى وإتحاد ملاك غضب وقالى موافقات ليه؟؟ دَ جوه مِلكى وأنا حر فيه!! وإشمعنا أنا أطلب تصاريح

وكل شباك أصبح لون والبلكونات إللى باقيه دهانها بقى كوكتيل ألوان ماكل واحد حُرْ فى مِلكه أنا بس إللى تتشاطروا عليه؟؟

#### «فراشان وحشران»

أفكار طايرة زى الفراشات ألوانها تسحر ميّات وألوف عالم الحشرات أسراره عجيبة محتاجة تفسير محتاجة تفكير!! وحِكْمة ربنا إللي خَلقْها فيها دروس للبني أدمين..

• • • • •

ليها ممالك وفيها قوانين مملكة النمل، ومملكة للنحل فيها نظام صارم ومتين وعمل جماعي ومتعاونين ياريتنا نبقي خلية نحل وننتج عسل لو ناس فالحين!!

. . . .

النحل أعداؤه الدبابير جماعة شر ما في منهم خير عايشين عاله وسط النحل ولا نسمع منهم غير الزنْ ويسرقوا رزق وخير الغير ويقتلوا كمان الشغالين!!؟

. . . . .

أمّا الفراشات فرحة للعين ألوانها ألهمت فنانين تشوفها هايمة بين الزهار تنقل رسائل حُبْ ما بينها «كيوبيد» شايل حُبْ وحَبْ وينتج ثمار للبني أدمين!!

## أيام زمان .. «حكاينك مع النلاجة»

جالنا «نِقُوْط» في الصّبحِيّة جنيهات قليلة لكن هَيّه!! في أيامنا القرش له إيمة وعشرة منه تكفى العيلة لأكل يوم وتبقى كفاية والحلو عسل ويّاه طحينة

قعدنا نحسب أنا وهيّه ناقصنا أية من عفش البيت؟ كان نفسنا نجيب تلاجة تسعة قدم - يا سلام نعمة!! «إيديال» وفلوسها بقت جاهزة ونكرم ضيوفنا لما تزورنا

وعشان ما نسيبهاش فاضية ونجرب حلاوة تبريدها بدأنا بإزازتين مَيّه «كام إزازه مياه غازية» من كشك «عازر» قدامنا وبكرة نجيب فاكهة وخضار واللحمة تيجي أول الشهر دَ الكيلو وصل لنص جنيه عشان مشفى أو «أنتركوت» وإللي بعضمه بتلاتين قرش دِ مصر الجديدة ودي أسعارها

صقور وفراشات هائمة

ويابخت سكان «تحت الربع»

.....

زارتنا حماتي وشافتها بركتلنا وفرحت بيها ورجعنا تاني يوم من الشغل لقينا «الإيديال» عمرانه

حماتی الله يرحمها

ماهنش عليها تكون فاضية!!

. . . . . . . . .

سترتنا لما زارنا زميل من العرب جيّ للتدريب جهزنا اللازم لضيافته حلو وفاكهة وكنافة والكوكاكولا طبعاً مشروب اللمنظرة وأصبح عادة

•••••

وصل وجلسنا نتسامر عن أمل الوحدة العربية دَ كان شعارنا ورفعُه جمال وساعينا ليه شعب ودولة كأمل لنهضة وحرية خدنا الكلام ونسينا نسأل ضيفنا العزيز تشرب أيه ساقع .. ولا شاى دافي مع الكنافة والحلويات

أوّل نِدوق تَمْر بِلادى بلد الحبيب نبينا الهادى ونشرب معاه شوية ميّه من نيل بلدكم الغالى دَ زمزم مصر هوه النيل

صقور وفراشات هائمة
 كأنه نهر مِنْ الجنة
 وغير ميتهم ما بيرويش

بعد ما دُقْنا التمر معاه وشربنا ميتنا الساقعة كان صعب ناكل شئ تانى من كل طيّب قدمناه

بهدية غالية من أهل البيت البركة وصلت جوه البيت ودى حكاية التلاجة فكرنى بيها راجل مغرور نسى الأصول وتاريخ وجزور

## نبض القلوب وكلمات تبحث عن لحن





#### لهفة قلب

وانتى جنبى
باشتاق اليكى!!
لبسمتك لضحكتك...
لطلتك ولخطوتك..
لعطر شعرك - وخصلتك!!
بتداعب رِمش العين
وتزيد في سحر نظرتك!!
ولحن كلامك بأشمعه
دليل رضانا وفرحتك...

سألت قلبي؟؟

صقور وفراشات هائمة

ليه يا قلبي لهفتك؟؟

ماهي معاك!!

مالية عليك وحدتك

ونورها مالى دنيتك؟؟...

• • • •

رد وقالي:

اللهفه دى مش لهفتي

دى لهفتك..!!

ودقتي إللى سامعها

في لحظه تبقى دقتى...

وكتير بتبقى دقتك...

لما تزود سرعتي

لما تقرب نحيتك!!

مظلوم معاك- تعبان معاك

ياريت تِهدى لهْفِتك !!

## إيه الخبر

إيه إللي جارى؟ كل ماتمر بخيالي!! بسرعة أهرب!! رغم إنى نفسى أقرب؟ وهروبي د سببه أيه؟ ياريت تجاوبني عليه حزروني الكل منك عشان كده بعدت عنك وأنا نفسي أبقى جنبك

لا قادرة أنسى إللي سمعته

--- صقور وفراشات هائمة

وخايفة قلبي ينكسراا

....

ولا قادره أسيب قلبى لحيرته ياريت تقول إنت الحقيقة إللى سمعته كلام صحيح!! ولا إشاعة مش خبر؟ في ناس شغلتها الخراب وشرها كأنه قدر صارحنى قوللى أيه الخبر... خايفة قلبى ينكسر!!

## لاكلام ولا خصام

بعد إللّى سمعته مِنك ماعدش بينا كلام وإللى شفته بِعنيّة بعده ماينفع سلام كمل طريقك لوحدك وأنا في طريقى كمان

> حرة من غير قيود كأن إللى بينا ماكان نِسْيانه أصبح سهل بعد إللى سمعته منك

#### بعد ما جربن نارك !!

إنّت تاني مش خلاص وعدتني!! تروح لحالك وَاروح لحالي الصراحه ما بينا غابت والموده من مُدة ماتت واللوع سكن مكانها والحلول بينا استحالت!! قُلْت كام مره خلاص؟ الخداع ماعدش طبعك وقلبك مَليَّان بِالإخلاص!!

وجائ تاني!!

لجل ماتغيرلي حالي؟؟

بعد ماجربت نارك

تفتكر أعيشها تاني؟

. . . . .

كل إللّى عارفين الحكايه حزرونيّ أسمع كلامك ولاّ قلبي يحن تاني روح لحالك سيبني في حالي

. . . . .

#### بصدقك

بِصَدَق كَلامِكْ لأن إللي بينا عشره سنين وحتى فيسكوتك أسمع قلوبنا تعزف حنين وعِشنا في راحة بعَهْد الصراحة والوِد بائي وصونا اليمين!! وخوفي عليكي - وخوفك عَليّة أقوى دليل سيرنا في طريقنا صقور وفراشات هائمة طريقنا الطويل وياما تِعبْنا – وياما فِرخنا وياما كِسبْنا – وياما خِسرْنا وعوضنا عنها راحة الضمير

لأن إللي بينا عهد متين

وبصدق كلامك

• • • • •

# بدون حِلْمَان

صدقینی حبیبتی بدون حِلْفاَن!! صورتك فی عِنیة لِحد مانام وفی أحلامی فی حضنی كمان زی جناحین فی أی مكان

. . . .

مهما يكون بينا مسافات أسمع صوتك لحن حنان أحلى من كل النغمات ناى وكمان وكم آلات

. . . .

وإنت بعيده بقي كِده حالي

— صقور وفراشات هائمة

وانت جنبي أدرى بحالي

ومهما وصفت ولاحكيت

مافيش حروف تكفى الحكايات

. . . . .

وصدقینی بدون حلفان صُورتك فی عنیّه بَعْد مَانَام

. . . .

#### عيد الأم

في عيد الأم يا أمي حقول وأعيد من تاني نفسى أبوس تاني الإيدين وخدودك الطاهرة الحلوين وأغرق في حضنك الدافي وأقول وأعيد وأقول تانى كل ما تمر السنين شوقى يزيد وصورتك تنور وجداني ولحن صوتك نغم مالي قلبي ووداني

صقور وفراشات هائمة

كأنى سامعة النهاردة من لحظة وثوانى وكلامك كله حِكَمْ رسمتلى أيامى

#### سَماح

سماح .. سماح لازم أسامح رغم إللي قلته کان صعب جارح ما أعدرش أحاسب ولاحتى أعاتب أصل إللي بينا بستان وطارح والعمر كله بحلوه ومرة عيشناه سوى ودقنا الدفي وفي عشنا دقنا الهنا

صقور وفراشات هائمة

وبعد ماكنا إنت وأنا أصبح ما بينا زرع أخضر أهم منّا وإسمه الضنى ولازم أسامح

. . . .

#### مكسوف أقول!!

أجمل شعور رغم التعب لحظة لِعبى مع العيال!! لما سمعته بينادينى جدو جدو جيبلى لِعب حسيت أنى رجعت طفل ونفسى ألعب بِاللّعب بطلت أقول كلام كبار وحبيّت مصاحبة الصغار وفي قربهم شفت العجب!!

البراءة تسحرك

صقور وفراشات هائمة والخيال يفتح سكك لحاجات أكتر كتير...

من السياسة والأدب!!

# عقلى بيقولى كلام(\*)

قَناة بِتْقُولَى كَلام وجُرنَال بِيقُولِى كَلام النَاس بِيقُولوا كَلام وعَقْلَى بِيقُولَى كَلام إحْتَرتْ أَصَدق مين!! وإحترت أَكدِب مِيْن!! عَقلَى يَا عَقلَى ....

(\*) مع اعتذار للموسيقار محمد عبد الوهاب.

#### «فنجان شای»

ضُوءُ القَمَر دَايِبْ بِفِنْجَان شَاى مَع كُل لَمسه شَفايف أَتمنى أَكُون فِنْجَان !! شَايها مِنْ غير شُكّر – والسكر لزمتُه إيه ؟ كِفايه حِلو الشفَايف – دوبْني مع الفِنْجَان

# أنث مين

سألتِني أنِت مين؟ تقصد إسمى؟ ولا وظيفتى؟ ولاّ نسبي وأبوية منين؟ ومعرفتش أرد وأقولها مين!!

هو الاسم يهم في أيه؟ ياما صفات عكس الأسماء!! صادق تلاقيه أكبر كدّاب وسعيد راجل حزين موكوس محظوظ دايماً مَتعُوس مَنْحوس!! يمكن بتسأل عن شغلي

صقور وفراشات هائمة
 ومرتبى أصبح كام
 لو قلتلها إنى موظف
 «مستخدم» وليّه رئيس
 يوم فى طنطا وبكرة أسوان
 ومهما قبضت عايش غلبان!!

• • •

مش معقول قصدها عيلتى ياما عَالم خَلَفِ جاهل أو دكتور أبوه غلبان وجَنيني إبن حَداد ودَ رغم الْعرق المداد!!

ولو قصدها أصلی ونسبی أنا مصری من عیلة تمام وأكید أصلی فرعونی

وجدى طارد الهكسوس بِحُبَه لأرضه ونيله مهوس أقسم إنه ما يلوثه أبداً وإنه بروحه وماله يفيده

...

قلت وهَتعب نفسي أنا ليه؟ مش عارف سؤلها ده ليه!! قلت: أنا مخلوق من مخلوقاته سبحانه سمّاه إنسان وعَلَّمه كل الأسماء مَيزّة بالعقل وهداه لطريق الخير أدامه وشيطان الشر وراه!! ورسالته إنه يعمر ويسبح بإسم الله

- صقور وفراشات هائمة وعرض عليه أمانة الدنيا وعقله الضعيف صور له يقدر يصونها ويحفظها وقبل الأمانه يا ولداه!!

ومن غیر لف أو دوران أنا واحد غالبان من دول حیرته وعذابه من عَقْله ویوم ما حاعرف أما مین هقول دغری بدون تأخیر

### الونياأحلى

في عنييكي شفت الدنيا أجمل وأحلى رغم المطر والبرد بِلفحة الهَوى يِحليَ وعلى خدود الشجر زهور وورد وفل وزقزقة عصفور عاشق بينادي لوليفته بيقول تعالى النسمة هنا أحلى

— صقور وفراشات هائمة

السما صافية

والشمس دافية

والغنا يِحلي

وقوس قزح راسم بألوانه

حَبْل المحبة ويقولهم

الدنيا هنا أحلى

#### «جهاز مناعة مجنون»

إنذارات إنذارات!! ماقصدش إنذارات في حُروب أو نشرة جوية في أخبار دى إنذارات أنواع ياما!! لجهاز مناعة صايبة جنون!!

جهاز مناعتى زى «الخال» (\*) بسببه عايش خايف معزول فَرقْ الَحرارة بِين أوضتِين أوريحة جاية من المطبخ

(\*) الشاعر عبد الرحمن الأبنودي.

صقور وفراشات هائمة
 قلی بصلة أو بیضتین
 تقلب کیانة فین ما یکون

«وياعيني» أيام الخماسين أحتار أهرب وأروح فين؟ أكح وأعطس ونَفَسِي يروح وجهاز مناعتتي المجنون شایف دکله هجوم زری أو حرب كيماوية وغازات يحشد جنوده جوايا وحرب تقوم وجِسمى يفور ومهما أقولة إنذار كاذب لايسمع كلامي ولا الدُكْتور

لأ والغريبة لو ريحة حلوة

مِن «مُزّة» ورحيتها برفان
ولو حتى من أغلى الأنواع
يخنقنى أكتر ويجبلى صداع
وصدرى يصيبه الهيجان
وبدل ماقول رِحْتك حِلوة
أحط منديل على وِشّى
بلا خيبة!! كا الهيجان أنواع!!

# یا زمان 🐌

من أول ما كتبت في سن الصبا لحفل نادي هواة الموسيقي والتمثيل بالمنصورة

الزمان إلى قسيت منه زمان جه صالحنى وقال سامحنى عللّى كان وندانى وقاللى دوق طعم الحنان من حبيب كان فى إنتظارك من زمان

••••

يا زمان لك حال جديد والعزول أهو راح بعيد

<sup>(\*)</sup> أول ما غنت المطربة (عايدة الشاعر) رحمها الله بركن الهواه بالإذاعة المصرية في بداية الستينيات من القرن الماضى، وكانت من تلحين شقيقها الأكبر محمد الشاعر وكان يعزف الكمان واشتهر بعد ذلك كمذيع معروف بإذاعة مونت كارلو العربية.

وفى حبيبى حقول واعيد

یا زمان

. . . . .

دَ أنت قربت البعيد

والحزين إللي بكي

أصبح سعيد

ياحبيبي إنت بسمة الزمان

إنت نسيتني إللي كان

وفي عينيك شفت نظرة الحنان

لما قالتلي عينك آن الأوان

. . . .

#### يوم رحيل زويل

صعب أقول رحيل راجل عزيز علينا مات!! من البشر قامات خالدة أعملها محفورة بالوجدان في العقل ما يطولها النسيان!!

الزمن وله مقاسات بتهزم المسافات ومقياسه إللي وصله عدل لنا الحسابات وفتح لنا طرق وبيبان

• • • •

الكون فيه سرعات تفوق كل خيال

والفيمتو ثانية دليل إن علوم البشر مهما تزيد ولاشيئ من قدرة الخلاق ويفعل بكونه ما يشاء

• • •

إسراء ومعراج كان بقدرته لحظتين وممكن نتصوره الآن بعلم البشر عادى لو مش ناقصنا إيمان

## قبل الوداع الأخير

لازم أودع صِفَاتِكُم وعَادَتِكُم قبل الوداع الأخير بَوَدَعْ الشّر بِدِيَارْكُم تَوَاكُل وَكَسَل وَكِذْب نِفَاقُ وَغِلْ وَحِقْد الابترحموا ولاراضين برحمة ربنا تنزل، للغلابة الشغالين في عز الحر والبرد

قبل ما تنقد وتفتى

إسأل نفسك سؤال...

عملت لناسك أيه ؟

أو حتى لنفسك أيه؟

عالة على غيرك ليل نهار تشتكي!!

لا سلاح ولا فاس ولا بتبني أساس

ولما يجد الجد وبلدك تحتاجك

جبان من المعركة تهرب ولا يشوفك حد

. . . .

بتلجأ لأرض الغريب

وتمد إيدك ليه

وتقول وطني ظالمني

وتبيعه وتعاديه

. . . .

وإللي بيبنيه غيرك

شايفه كمان بعنيك

صقور وفراشات هائمة
 واضح وضوح الشمس
 د قلبك وعقلك سواد
 وحقد على غيرك
 تهد إللى بنوه بأمر أسيادك

. . . .

#### «حفيف طيف»

«كتبت بمناسبة خطبة الحفيد مصطفى وماريًا»

نسمة شمالى هَفتْ فى حر الصَيف وقالت أنا ليكم مش مجرد ضيف كلامها لحن جميل «لكرساكوف» غربى وسمعته أنا شرقى وسحر شهرزاد شفته أنا مرئى!!

الشَعرُ دَهبی والخدود وردی «وصوفه» یا عینی قلبه إتخطف بدری و ماریا قالت معاك

صقور وفراشات هائمة

أأضى بقيت عمري

الحب غّلاب

وأنا بس أعمل إيه!!

لازم أوافق

وأدعى من صميم قلبي

يسدد خطاهم ويحلى أيامهم

وببركة شهر الصيام

تتحقق أحلامهم

في ليلة القدر الدعاء مقبول

إغفر وبارك ياربي فيهم وفي ولادهم

يمكن باقيلي عُمْر أشوفهم ولاعِبهُمُ

وتيته (لولا) تقول دَللعني ودلعهم!!

جدو منعم

#### « الدليل »

أيها الكون الفسيح لا أرى فيك الدليل!! الخلاق مِل، قلبى أقرب من حَبْل الوريد سبحته وحمدته دوماً وكرمه وعطاؤه يزيد

#### صدر للكانب

- ١. الديوان الأول: البرستو، رقم الإيداع ٢٠١١/٨٥٧٧.
- ٢. الديوان الثاني: ما بحبش كده، رقم الإيداع ٢٠١٣/٤٨٤٦.
- ٣. الديوان الثالث: رسائل قصيرة، رقم الإيداع ٢٠١٤/ ٢٠٦٥.
  - ٤. الديوان الرابع: قطوف، رقم الإيداع ٧٩٠/٢٠١٦.
- ٥. كتاب: حكايات من صندوق الـذكريات، رقم الإيـداع
   ٢٠١٦/٧٩٠.
- ٦. الديوان الخامس: لقاء الشروق والغروب، رقم الإيداع
   ٢٠١٦/١٥٨٢٢.

# الفهرس

٣	الإهداء
٤	مقدمة المؤلف
٧	هموم بشر و أوطان:
٩	۱. أوراق وأوراق
11	٢. شباب ما بعد الثمانين
	٣. خير الكلام
10	٤. إحنا مين؟؟
19	٥. آه يا سوريا
YY	٦. «فريمان مَامَتْش)
٢٦	٧. مش فاهم
۲۸	۸. حلم غالی۸
٣٠	٩. بِيْعَلِى أَرْضَك ؟؟
٣٢	۱۰ َ رسالة لتوني بيلر
٣٤	١١. مشاكل مصر الإقتصادية
٣٧	١٢. أم المشاكل
٣٩	١٣. صُوّر بالكلمات
	١٤. دولة قانون
<b>{{\cdot \}</b>	١٥. (حكاية القرامطة)

	صقور وفراشات هائمة -
٤٧	١٦. الشِيخ منْصَرْ)
٥٢	١٧. ﴿آخر الكلامِ السبب
17	حيرة إنسان:
٦٣	١. سن القلم
٠٠٠	۲. إغتراب
٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠٠	٣. نفسك في إيه؟؟
79	
٧٢	
νε	٦. حيرة إنسان
٧٨	
٧٩	
۸۲	
	للفصحى حنين:
٨٥	
۸۷	
۸۸	
٩١	
٩٢	
٩٤	
۹٦	
٩٨	
99	

إشات هائمة	ــــــــــــــــــــــــــــــــــــــ
١٠٠	١٠. هي والكلمات
١٠٢	١١. حوار مع ذات الخمار
١٠٤	١٢. لست أنّت
١٠٦	١٣. غثاء السيل
١٠٨	<ol> <li>ا. «مكتبة الإسكندرية»</li> </ol>
1 • 9	من أورافتي المبعثرة:
111	١. فرعنة !!
117	۲. قلب مشحون لراجل عجوز
118	۳. ياريت ۱۱
110	٤. طريق الخلاص
117	٥. قلبي مشاع للناس
117	٦. عقدة نقص
119	٧. خسوف ولاكسوف!!
171	٨. الديناصور إنقرض
177	۹. كركبة فكرية
	١٠. كنت حقولها!!
170	۱۱. (مِلْکی وأنا حر فیه)
١٢٨	۱۲. افراشات وحشرات
١٣٠	۱۳. أيام زمان (حكايتي مع التلاجة)
140	نبض القلوب وكلمات تبحث عن لحن:
١٣٧	١. لهفة قلب١
189	٢. إيه الخبر

	—— صقور وفراشات هائمة –
: [ ]	٣. لاكلام ولا خِصام
۱٤٣	٤. بعد ما جربت نارك!!
1 8 0	٥. بصدئك
۱٤٧	٦. بدون حِلْفان
١٤٩	
``````````````````````````````````````	
۱۵۳	
١٥٥	
\oV	
171171	
٠, ٣, ٢	
177	
٠٦٨	
١٧٠	
1٧٣	
١٧٥	

